

## I - ARABAKO BATZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

Arabako Foru Aldundia

### OGASUN, FINANTZA ETA AURREKONTU SAILA.

**Foru Gobernu Kontseiluaren 1/2019 Zerga Premiazko Araugintzako Dekretua, uztailaren 30ekoa. Onestea Arabako zerga araudia egokitzea Estatuak hainbat zergatan egindako aldaketetara**

Ekonomia Itunak 26., 33. eta 36. artikuluetan ezartzen du balio erantsiaren gaineko zerga, zerga bereziak eta joko jardueren gaineko zerga zerga itunduak direla eta Estatuak aldi bakoitzean xedatzen dituen funtsezko arau substantibo eta formal berak aplikatuko zaizkiela, berariazko salbuespen batzuk gorabehera.

Azaroaren 27ko 28/2014 Legeak ezartzen du elektrizitatearen gaineko zerga berezia ez dela fabrikazioaren gaineko zerga, baizik eta energia elektrikoa kontsumitzeko hornitzea edo energia elektrikoa sortzen dutenek bere kontsumitzea kargatzen duena. Aldaketa horren helburua kostu administratiboak murriztea da, bai elektrizitatearen merkatuko agenteenak, bai Administrazioarenak. Zergaren arautegia Europar Batasunaren zuzentarauak ezartzen duenera moldatu da.

2017ko uztailaren 19an, Ekonomia Ituna egokitzeko, Ekonomia Itunaren Batzorde Mistoak elektrizitatearen gaineko zergari buruzko xedapenak eguneratzea erabaki zuen, besteak beste. Horren ondorioz abenduaren 28ko 10/2017 Legeak Ekonomia Ituna aldatu zuen.

Dekretu honen bitartez aldaketa horiek Arabako zerga araudira moldatzen dira, eta hurrezkeroko zerga horretan egin diren aldaketak ere bai (6/2018 Legea, uztailaren 3koa, Estatuaren 2018ko aurrekontu orokorra; 15/2018 Errege Lege Dekretua, urriaren 5koa, trantsizio energetikorako eta kontsumitzaileak babesteko presazko neurriena).

Joko jardueren gaineko zergari dagokionez, horren araudia uztailaren 3ko 6/2018 Legeak, Estatuaren 2018ko aurrekontu orokorrenak, ekarri dituen aldaketetara moldatzen da.

Balio erantsiaren gaineko zerga dela eta, honako bi errege dekretu hauek ekarritako aldaketak txertatzen dira: 26/2018 Errege Lege Dekretua, abenduaren 28koa, arte sorkuntzarako eta zinema sorkuntzarako presazko neurriak onartzen dituena; 27/2018 Errege Lege Dekretua, abenduaren 28koa, zergen arloko eta katastroaren inguruko neurri batzuk ezartzen dituena.

Azkenik, presazkotasunarekin ezartzen da talde inbertsioko entitateen partaidetzen edo akzioen birsailkapenen zerga neutraltasuna.

Ekonomia Itunak 26., 33. eta 36. artikuluetan ezartzen duena bete behar denez gero, aldaketa horiek guztiak Arabako zerga ordenamenduan txertatu behar dira.

Beste alde batetik, lehen aipatu den bezala, ezinbestekoa da ahalik azkarren onartzea talde inbertsioko entitateen partaidetzen edo akzioen birsailkapenen zerga neutraltasuna lortzeko behar diren zerga xedapenak.

Zerga Araudiaren Zerbitzuak horri buruz emandako txostena aztertu da.

Horren ondorioz, Ogasun, Finantza eta Aurrekontu Saileko diputatuak proposatuta eta Diputatuen Kontseiluak gaur egin duen bileran gaia aztertu ondoren, otsailaren 28ko 6/2005 Foru Arau Orokorrak, Arabako zergenak, 8. artikuluan eta abenduaren 18ko 52/1992 Foru Arauak, Arabako Foru Aldundiaren antolaketa, funtzionamendu eta araubide juridikoarenak, ematen dizkιδaten eskumenez baliatuz, presako arrazoiak direla eta, hauxe

## XEDATZEN DUT:

Lehena. Otsailaren 16ko 1/1999 Zerga Premiazko Araugintzako Dekretua, zerga bereziak arautzen dituen, aldatzea.

Aldaketa batzuk egiten dira zerga bereziak arautzen dituen otsailaren 16ko 1/1999 Zerga Premiazko Araugintzako Dekretuan (indarreko legerian ezartzen diren ondorioak edukiko dituzte); hona:

Bat. 1. artikulua aldatzen da eta honela geratzen da:

“1. artikulua. Zerga bereziak zer diren.

1. Zerga premiazko araugintzako dekretu honetan (hemendik aurrera Araugintzako Dekretua) arautzen diren zerga bereziak kontsumo berezi batzuen gaineko zeharkako zergak dira eta fase bakarrean kargatzen dituzte zenbait ondasunen fabrikazioa, inportazioa eta, hala gertatuz gero, barneko lurralde eremuan sartzea, zenbait garraio ibilgailuren matrikulazioa, energia elektrikoaren hornidura eta ikatza kontsumotako jartzea, araugintzako dekretu honetako arauekin bat etorritik.

2. Zerga bereziak dira fabrikazioaren gaineko zerga bereziak, elektrizitatearen gaineko zerga berezia, zenbait garraiobideren gaineko zerga berezia eta ikatzaren gaineko zerga.”

Bi. 2. artikuluko 2. idatz zatiari d) letra gehitzen zaio; hona testua:

“d) Elektrizitatearen gaineko zerga berezia: energia elektrikoaren hornidura kasuan, elektrizitatea berak kontsumitzeko eskuratzen duen pertsona edo entitatearen hornidura puntua Arabako Lurralde Historikoan egonez gero; energia elektrikoa sortzen duenak berak sortzen duen elektrizitatea kontsumitzen duenean, kontsumoa Arabako Lurralde Historikoan gertatuz gero.”

Hiru. 3. artikuluko 4. idatz zatia indargabetzen da.

Lau. 13. artikuluko 13. idatz zatia honela geratzen da:

“13. Artikulu honetako aurreko idatz zatietan ezartzen dena gorabehera, gas naturala kostu bidez hornitzeko kontratu baten esparruan fabrika edo zerga biltegitzat hartzen diren instalazioetatik gas naturala irteten denean, hidrokarburoen gaineko zergaren sortzapena fakturazioaldi bakoitzean hornitutako gas naturalaren prezioaren zatia eska daitekeenean gertatuko da. Aurrekoa ez da aplikatuko gas naturala beste fabrika, zerga biltegi edo erregistratutako hartzaile bati bidaltzen zaionez, ez eta hornidurarako hodi finkoak gabe beste baliabide bat erabiltzen denean ere.

Artikulu honetako 1. idatz zatian ezartzen dena aplikatzeko, aurreko paragrafoan aipatzen direnak ez beste gas natural hornidura batzuetan subjektu pasiboek hauxe hartuko ahal izango dute kontuan: ondoz ondoko hirurogei egunetan, gehienez, hornitutako gas naturala aipatutako aldia amaitu ondoko egutegiko lehen hileko lehen egunean irten dela fabrikatik edo zerga biltegitik.”

Bost. 18. artikuluko 1. eta 4. idatz zatiak eta 7. idatz zatiko c) letra honela geratzen dira:

“1. Fabrikazioaren gaineko zerga berezien subjektu pasiboek eta zerga horiek ordaindu behar dituzten gainerako pertsonak bidezko zerga aitortpenak aurkeztu beharko dituzte eta, behar denean, bidezko autolikidazioak egin beharko dituzte. Gainera, bermeak jarri beharko dituzte zerga beharrei erantzuteko.”

“4. Hurrengo idatz zatian xedatzen den salbuespenarekin, Ogasun, Finantza eta Aurrekontu Saileko foru diputatuak ezarriko du fabrikazioaren gaineko zerga berezien subjektu pasiboek eta zerga horiek ordaindu behar dituzten gainerako pertsonak zerga zorra non, nola, noiz eta zer inprimakitan zehaztu eta sartu behar duten.”

“c) Produktu hauen zirkulaziorako eskakizunak eta, bereziki, Batasunaren barruko zirkulaziorako agiriak erabiltzeko baldintzak.”

Sei. 19. artikuluko 2., 3., 5. eta 6. idatz zatiak aldatzen dira eta 7. idatz zatia gehitzen da; hona testuak:

“2. Hauexek dira zerga berezien arloko arau hausteak:

a) Fabrikazioaren gaineko zerga berezien kargapeko produktuak fabrikatzea eta inportatzea zerga premiazko araugintzako dekretu honetan eta beraren arautegian ezartzen diren baldintzak eta betekizunak bete gabe.

b) Fabrikazioaren gaineko zerga berezien kargapeko produktuak Batasunaren barruan zirkulatzea saltzeko asmoarekin, baldin eta, agiri elektronikoko baten itzalpean egin behar dela, agintaritze eskudunak emandako erreferentziako kode administratiboa falta bada.

c) Fabrikazioaren gaineko zerga berezien kargapeko produktuak edukitzea saltzeko asmoarekin, baldin eta ez bada frogatzen sortutako karga ordaindu dela, etendura araubidea aplikatzen dela edo salbuetsita dagoela.”

“3. Aurreko zenbakiko a), b) eta c) letretan aipatzen diren arau hausteengatik produktuen kopuruari dagokion kuotaren ehuneko 100eko isuna ezarriko da; kuotak kalkulatzeko, arau haustea agerian geratzen denean indarrean dagoen tasa aplikatuko da. Isuna 1.200 eurokoa izango da gutxienez.

Zergen arloko arau hausteak behin eta berriro egiten badira, aurreko paragrafoetan ezartzen denaren arabera isunari ehuneko 25 gehituko zaio. Arau hausteak behin eta berriro egitea izango da aurreko 2. zenbakian ezartzen diren debekuetako bat hausteagatik administrazio bidean irmoa den ebazpenaren bidez zehapena ezarri eta hurrengo bi urteetan beste bat egitea.”

“5. Zergen arloko arau haustea da fabrikazioaren gaineko zerga berezien kargapean dauden produktuak saltzeko asmoarekin zirkulatzea Batasunaren barruan, zirkulaziorako behar diren arauzko dokumentuetan funtsezko datuen bat falta dela edo oker dagoela. Arau hauste hau egiteagatik diru zehapena ezarriko da: zirkulazioan dauden produktuei dagokien kuotaren ehuneko 10 (600 euro gutxienez).

Honako hauek dira zirkulazio dokumentuetako funtsezko datuak:

1. Garraiatzen ari den salgaia behar bezala identifikatzeko (zer den eta zenbat dagoen) behar diren datuak.

2. Bidaltzailea, hartzailea eta produktuak zuzen identifikatzeko behar diren datuak, zirkulazio dokumentuaren zenbakia barne.

3. Zirkulazio zigorik egonez gero, bakoitzaren zenbakia edo edukiera, eta ezarrita dagoen ontziarekiko korrespondentzia.

4. Bidalketa noiz hasi den (data).”

“6. Zergen arloko arau haustea izango da zerga markarik edo ezagutzekorik ez daukaten edariak edo tabako laboreak edukitzea saltzeko asmoarekin, baldin eta marka hori araudiaren arabera beharrezkoa bada, honako kasu honetan izan ezik: jokabide horri 2. idatz zatian ezartzen dena aplikatu behar bazaio. Arau hauste egiteagatik honako zehapen hauek ezarriko dira:

a) 150 euroko isuna arau haustea saltzeko asmoarekin daukan markarik gabeko 1.000 zigarretako; arau hauste bakoitzaren isuna 600 eurokoa izango da gutxienez.

b) 10 euroko isuna arau haustea saltzeko asmoarekin daukan markarik gabeko edari eratorri litroko; arau hauste bakoitzaren isuna 600 eurokoa izango da gutxienez.

Aurreko a) eta b) letretan ezartzen diren zehapenak ehuneko 25 gehituko dira arau haustea behin baino gehiagotan eginez gero. Arau haustea behin baino gehiagotan egitea izango da

zenbaki honetan ezartzen diren arau haustek egiteagatik administrazio bidean irmoa den ebazpenaren bidez zehapena ezarri eta hurrengo bi urteetan beste bat egitea.”

“7. Zergen arloko arau haustea da zerga marka faltsuak, konponduak edo berreskuratuak edukitzea. Arau hauste hau egiteagatik diru zehapen finkoa ezarriko da: 10 euro zerga marka faltsu, konpondu edo berreskuratu bakoitzeko.”

Zazpi. I. tituluko IX. kapitulua indargabetzen da.

Zortzi. III. tituluari II. kapitulua gehitzen zaio, eta orain ikatzaren gaineko zerga berezia dena titulu horretako I. kapitulua izango da. Hona testua:

### “III. TITULUA

#### **lkatzaren eta elektrizitatearen gaineko zerga bereziak**

##### I. KAPITULUA

lkatzaren gaineko zerga berezia

(...)

##### II. KAPITULUA

Elektrizitatearen gaineko zerga berezia

#### **92. artikulua. Izaera**

Elektrizitatearen gaineko zerga berezia elektrizitatearen kontsumoa kargatzen duen zeharkako zerga da. Hain zuzen ere, energia elektrikoa kontsumorako hornitzea kargatzen du fase bakarrean, bai eta norberak sortzen duen elektrizitatea kontsumitzea ere.

#### **93. artikulua. Eremu objektiboa**

Elektrizitatearen gaineko zerga bereziaren eremu objektiboa honako kode hau daukan energia elektrikoa da: 1987ko uztailaren 23ko 2.658/87 (EEE) Erregelamenduaren bidez ezarritako muga zergen eta estatistiken nomenklaturako 2716 kodea.

#### **94. artikulua. Aplikazio eremua**

1. Elektrizitatearen gaineko zerga berezia araugintzako dekretu honetan xedatzen denarekin bat etorri eskatuko da Arabako Lurralde Historikoan.

2. Aurreko zenbakian xedatzen denak ez du ezertan eragotziko Espainiako barne antolamenduan txertatutako nazioarteko itunetan eta hitzarmenetan xedatzen dena, Espainiako Konstituzioak 96. artikuluan ezartzen duenarekin bat etorri.

#### **95. artikulua. Zerga gaia**

1. Zergapean daude:

a) Pertsona edo entitate bati energia elektrikoa hornitzea berak kontsumitzeko; hauxe da energia elektrikoa hornitzea: sare elektrikoa erabiltzeko saripeko zerbitzua egitea, bai elektrizitatea ematea.

Zerga hau aplikatzeko, energia ibilgailuak kargatzeko erosten duten pertsona fisikoak zein juridikoak kontsumitzaileak izango dira beti.

b) Norberak sortzen duen energia elektrikoa kontsumitzea.

2. Araugintzako dekretu honetan ageri diren berezko substantibotasuneko kontzeptuak eta terminoak direla eta, sektore elektrikoaren Estatuko araudian xedatzen dena aplikatuko da, dekretuan bertan zehazten diren kasuetan izan ezik.

**96. artikulua. Zergapean ez daudenak**

Ez dago zergaren kargapean norberak guztira 100 kilovat (kW) baino gehiago ez dituzten sorgailuen edo sorgailu multzoen bitartez sortzen duen elektrizitatea kontsumitzea.

**97. artikulua. Salbuespenak**

Honako hauek salbuetsita daude (arautegian zehaztuko da nola):

1. Energia elektrikoa hornitzea harreman diplomatiko edo kontsularraren esparruan.
2. Energia elektrikoa hornitzea Espainiak onartzen dituen nazioarteko erakundeei eta erakunde horietako kideei, erakunde horiek eratzeko nazioarteko hitzarmenetan edo egoitzen akordioetan zehazten diren mugen barruan eta horietan finkatzen diren baldintzekin.
3. Energia elektrikoa hornitzea Espainia ez Iparraldeko Atlantikoaren Hitzarmenaren kide den beste estatu bateko indar armatuei edo horren zerbitzuko langile zibilei edo haien jantoki eta kantinetarako.
4. Energia elektrikoa hornitzea beste herrialde batzuekin edo nazioarteko erakundeekin egindako hitzarmenen esparruan, baldin eta hitzarmena balio erantsiaren gaineko zergaren salbuespenerako onartzen edo baimentzen bada.
5. Energia elektrikoa kontsumitzea iturri berriztagarrietako energia elektrikoa sortzeko, elektrizitatea eta beroa sortzeko eta hondakinak energia sortzeko baliatzeko instalazioen titularrek, baldin eta instalazioaren potentzia 50 megawatt-etik (MW) gorakoa ez bada.
6. Erregai pilen bidez sortzen den energia elektrikoa kontsumitzea.
7. Elektrizitatea sortzeko instalazioetan energia elektrikoa kontsumitzea jarduera hori egiteko, eta energia elektrikoa sortzeko, garraiatzeko eta banatzeko instalazioei energia elektrikoa hornitzea jarduera horiek egiteko.

**98. artikulua. Sortzapena**

Zergaren sortzapena une hauetan gertatuko da:

- a) 95. artikuluko 1. idatz zatiko a) letran arautzen den kasuan, fakturazioaldi bakoitzean hornitutako energia elektrikoaren prezioaren zatia eskatu ahal denean.
- b) 95. artikuluko 1. idatz zatiko b) letran arautzen den kasuan, energia kontsumitzen denean.

**99. artikulua. Zergadunak**

1. Honako hauek dira zergadunak:

- a) 95. artikuluko 1. idatz zatiko a) letran arautzen den kasuan, abenduaren 26ko 24/2013 Legeak, sektore elektrikoarenak, xedatzen duen gaikuntzarekin kontsumitzaileei energia elektrikoa hornitzen dietenak, artikuluko honetako 3. idatz zatian ezartzen dena gorabehera.
  - b) 95. artikuluko 1. idatz zatiko b) letran arautzen den kasuan, berek sortzen duen energia elektrikoa kontsumitzen dutenak.
2. Baldin eta irregulartasunen bat gertatzen bada xedearen arabeko salbuespena edo murrizketa aplikatu zaion elektrizitatearen erabileraren edo xedearen justifikazioan, hornitzaileak zerga zorra ordaindu beharko du, bai eta ezartzen diren zehapenak ere, hornidura bulego kudeatzaileak baimendutako edo aipatutako zerga onura eduki dezakeen kontsumitzaile bati hornitu zaiola frogatu ezean.
  3. Artikulu honetako hurrengo idatz zatian arautzen dena gorabehera, elektrizitate hornidura bat ez badago zergaren kargapean, salbuetsita badago edo kargari murrizketa aplikatzen bazaio, honako hau izango da zergaren karga zuzena jasan ez duen elektrizitate kopuruaren zergaduna:

hornitzaileari erregularizazioaren datu zehatzak arauz ezarritako epealdian eta moduan ez jakinarazteagatik bidegabeko zerga onura jaso duen kontsumitzailea.

4. Kontsumitzaile bati energia elektrikoa hornidura gune bakar batean hornitzen bazaio eta hornitutako energiaren zati bat kargatik salbuetsita badago araugintzako dekretu honek 97.7 artikuluan ezartzen duenaren arabera, zergaduna kontsumitzailea da. Horrez gainera, artikulua honetako 1. idatz zatiko a) letran aipatzen direnak ere zergadunak dira beren kontsumorako erositako elektrizitateagatik.

#### **100. artikulua. Zerga oinarria**

Hauxe izango da: balio erantsiaren gaineko zergaren aplikazio lurraldean loturarik gabeko pertsonen artean egindako energia elektrikoaren kostu bidezko hornidura batek balio erantsiaren gaineko zergaren tributaziorako edukiko lukeen zerga oinarria (urtarrilaren 19ko 12/1993ko Araugintzako Foru Dekretuak, balio erantsiaren gaineko zergarenak, 78. eta 79. artikuluetan arautzen duenarekin bat etorritik), elektrizitatearen gaineko zergaren beraren kuotak kenduta.

#### **101. artikulua. Likidazio oinarria**

1. Honako erabilera hauetako baterako den elektrizitatearen likidazio oinarria zerga oinarriari ehuneko 85eko murrizketa aplikatzearen emaitza izango da, arauz ezartzen diren baldintzak eta betekizunak betez gero:

a) Erredukzio kimikoak eta prozesu elektrolitikoak.

b) Prozesu mineralogikoak. Prozesu mineralogikotzat joko dira Europako Parlamentuaren eta Kontseiluaren abenduaren 20ko 1893/2006 (EE) Erregelamenduaren 23. banaketan sailkatutakoak. Aipatutako erregelamenduak, 2. berrikuspenerako jarduera ekonomikoen estatistikako nomenklatura (EEJN) ezarri eta Kontseiluaren 3037/90 (EEE) Erregelamendua eta estatistikako alderi espezifiko batzuei buruzko zenbait erregelamendu aldatzen ditu.

c) Prozesu metalurgikoak. Prozesu metalurgikotzat joko dira metala ekoitzi eta prestatzekoak, bai eta, metalezko produktuen ekoizpenaren barruan, forjatu, prentsa, trokelaketa eta luzaketa piezak, eraztun ijestuak eta mineral hautsen produktuak ekoiztea, eta gainazalen tratamendua eta galdaketa, beroketa, kontserbazio eta distentsio termotratamendua edo beste termotrata-mendu batzuk.

d) Elektrizitatearen kostua produktuaren ehuneko 50etik gorakoa den industria jarduerak.

Horretarako, produktu baten kostua honako hauen batura da: erositako ondasun eta zerbitzuen kostua, eskulanaren kostua eta kapital finkoaren kontsumoa. Kostua batez besteko unitateetan ematen da.

Elektrizitatearen kostua haren benetako erosketa balioa da, edo hura sortzeko kostua, enpresan bertan sortzen bada, zerga guztiak (BEZ kengarria ez beste guztiak) gehituta.

e) Nekazaritzako ureztatzeak.

f) Elektrizitate erosketen edo kontsumoen kostua produkzioaren balioaren ehuneko 5etik beherakoa den industria jarduerak.

Hori dela eta kontzeptu hauek zehazten dira:

– “Elektrizitate erosketak edo kontsumoa”: erosi edo kontsumitutako energia elektrikoaren benetako kostua, zerga guztiak (BEZ kengarria ez beste guztiak) gehituta.

– «Produkzioaren balioa»: negozioen zenbatekoa, izakinen aldakuntza, arribideko produktuak eta amaitutako produktuak gehituta.

2. Aisialdirako ontzi pribatuak ez portuko beste ontzi batzuei hornitzen zaien energia elektrikoaren likidazio oinarria zerga oinarriari ehuneko 100eko murrizketa aplikatzearen emaitza izango da, arauz ezartzen diren baldintzak eta betekizunak betez gero.

Horretarako, «aisialdirako ontzi pribatuak» dira jabeek edo errentamendua edo beste zer bait dela bide erabiltzeko eskubidea daukaten pertsona fisikoek zein juridikoek merkataritza ez beste xede baterako (batez ere ez bidaiariak ez salgaiak garraiatzeko, ez kostu bidezko zerbitzuak egiteko) erabiltzen dituzten ontziak, eta agintaritza publikoek ezartzen dituzten beharrianetarako erabiltzen ez dituztenak.

#### **102. artikulua. Zerga tasa**

1. Artikulu honetako 2. idatz zatian ezartzen dena gorabehera, zerga honen karga tasa ehuneko 5,11269632 izango da.

2. Idatz zatian ezartzen den zerga tasa aplikatzearen emaitzako kuota osoak ezin dira izan honako hauek baino txikiagoak:

a) 0,5 euro megawat-orduko (MWh), hornitutako edo kontsumitutako elektrizitatea industrian edo aisialdirako ontzi pribatuak ez portuko beste ontzi batzuetan erabiltzeko bada.

b) 1 euro megawat-orduko (MWh), hornitutako edo kontsumitutako elektrizitatea beste erabilera batzuetarako bada.

Idatz zati honetan arautzen den baldintza betetzen ez bada, a) eta b) letretan adierazten diren zenbatekoak 1. idatz zatiko zerga tasaren ordeztatik aplikatuko diren zerga tasatzat hartuko dira, eta aldiaren guztira hornitu edo kontsumitutako elektrizitate kopuru osoari (megawat-orduak, MWh) aplikatuko zaizkio.

3. Idatz zatian arautzen denari dagokionez, industrian erabiltzeko elektrizitatea da:

a) Goi tentsioan edo industria lantegi eta instalazioetara hornitzen dena.

b) Behe tentsioan hornitzen dena nekazaritzako ureztaketak egiteko.

4. Idatz zatian xedatzen dena ez da aplikatuko 101. artikuluko 1. idatz zatiko a), b), c) eta d) letretan arautzen diren kasuetan.

#### **103. artikulua. Kuota osoa**

Kuota osoa kalkulatzeko, aurreko artikuluan ezartzen denaren arabera zerga tasa aplikatu behar zaio likidazio oinarriari.

#### **104. artikulua. Jasanarazpena**

1. Zergadunek oso-osorik jasanarazi beharko diote zergaren zenbatekoa kargapeko eragiketa egiten dioten pertsonari. Horrek jasanarazpena onartu beharko du, araugintzako dekretu honetan xedatzen denarekin bat etorritik eginez gero, bien artean hizpatutakoa gorabehera.

Araugintzako dekretu honetako 101. artikuluan aipatzen diren murrizketen onuradunek adierazitako behin-behineko ehunekoaren arabera sortutako kuoten zenbatekoa jasanarazten duten zergadunek eta zerga kargapean ez egoteko edo salbuetsita egoteko onura eduki dutenek emandako datuen arabera jasanarazten ez dutenek jasanarazitako edo jasanarazi beharreko kuoten zenbatekoa erregularizatu beharko dute berariazko arautegian ezartzen den prozedura baten bitartez arautegian bertan ezartzen den moduan datu zehatzak jaso ondoren.

2. Sortutako kuotak fakturan jasanaraziko dira, bertan jasotzen diren gainerako kontzeptuetatik bereizita. Eragiketa salbuetsita badago edo likidazio oinarriari murrizketa aplikatzen bazaio, fakturan aipatuko da, eta onuraren oinarrian zer xedapen dagoen adierazi behar da.

3. 95. artikuluko 1. idatz zatiko b) letran aipatzen diren kasuetan, sortutako kuotak ez dira jasanaraziko kontsumitzailea zergaduna denean, ez likidazioa ikuskapen akten ondorioa denean, ez oinarriak zeharka zenbatesten direnean.

#### **105. artikulua. Kudeatzeko arauak**

1. Zerga honen zergadunek autolikidazioak aurkeztu beharko dituzte eta, aldi berean, zerga zorra ordaindu beharko dute. Aurreko paragrafoko autolikidazioak aurkezteko prozedura eta epealdia Ogasun, Finantza eta Aurrekontu Saileko foru diputatuak ezarriko ditu.

2. Zerga honen autolikidazioak aurkeztu behar dituztenek, artikuluko honetako 4. idatz zatian aipatzen diren ordezkariak eta araugintzako dekretu honetako 97. artikuluko 5., 6. eta 7. idatz zatietan arautzen diren salbuespenen onuradunek eta 101. artikuluko 1. idatz zatian aipatzen diren murrizketen onuradunek lurralde erregistro egokian inskribatzeko eskatu beharko diote jarduera egiten duten establezimendua dagoen tokian edo zerga egoitza duten tokian zerga bereziak kudeatzen dituen bulegoari.

Ogasun, Finantza eta Aurrekontu Saileko foru diputatuak zerga honen zergapekoen eroldaren egitura ezarriko du, eta horiek lurralde erregistroan inskribatzeko prozedura eta epealdia ere bai.

3. Aurreko bi idatz zatietan arautzen dena gorabehera, beharrezkotzat jotzen diren aitorten informatiboak aurkezteko eta beste betebeharrak formal batzuk betetzeko baldintzak eta betekizunak arautegi batean ezarriko dira.

4. Kontseiluaren 2006ko azaroaren 28ko 2006/112/CE Zuzentarauak, balio erantsiaren gaineko zergaren sistema bateratuari buruzkoak, 258. artikuluan ezartzen duenarekin bat etorritik, egoitza Espainiako lurraldean ez duten zergadunek egoitza Espainian daukan pertsona fisikoa edo juridikoa izendatu behar dute beren ordezkaria izan dadin zerga honen inguruko betebeharrarako zerga administrazioaren aurrean, eta izendapena zerga gaia gertatu baino lehen edo gertatzen denean, beranduenik, egin behar dute, eta frogatu.

#### **106. artikulua. Arau hausteak eta zehapenak**

1. Elektrizitate hornidura batean kargapean ez egoteko, salbuetsita egoteko edo murrizketa egiteko onura aplikatuz gero, zergen arloko arau haustea izango da datu zehatzak ez jakinaraztea arau ezartzen den epealdiaren barruan, baldin eta horren ondorioz bidezko kuota jasanarazten ez bada edo behar baino kuota txikiagoa jasanarazten bada.

Zehapenaren oinarria jasanarazi beharreko kuoten eta benetan jasanarazitakoen arteko diferentzia izango da.

Zehapena diru isun proportzionala izango da: ehuneko 15.

Horrelako kasuetan Arabako Zergei buruzko otsailaren 28ko 6/2005 Foru Arau Orokorrak 192. artikuluan xedatzen duena aplikatuko da.

Artikulu honetan arautzen den zehapena ez da aplikatuko honako kasu honetan: zehapena ezarri behar denean Arabako Zergei buruzko otsailaren 28ko 6/2005 Foru Arau Orokorrak 195. artikuluan arautzen duen autolikidazioaren ondoriozko zerga zorra ez ordaintzeagatik gertatzen den arau hausteagatik.

2. Aurreko artikuluko 4. idatz zatian aipatzen den betebeharra ez betetzea zergen arloko arau haustea izango da, eta horren zehapena diru isun finkoa izango da: 1.000 euro.

3. Zerga honen inguruko gainerako arau hausteak Arabako Zergei buruzko otsailaren 28ko 6/2005 Foru Arau Orokorrak xedatzen duenarekin bat etorritik kalifikatu eta zehatuko dira, aurreko artikuluan ezartzen dena eragotzi gabe."



Bederatzi. Hirugarren xedapen iragankorra gehitzen da; hona:

“Hirugarren xedapen iragankorra. Lurralde erregistroan inskribatzea elektrizitatearen gaineko zerga berezian

Zerga honen autolikidazioak aurkeztu behar dituztenak eta beraren tributazioan salbuespenen edo murrizketen onura jasotzen dutenak lurralde erregistro egokian inskribatuta badaude elektrizitatearen gaineko zergan, ez daukate zertan eskatu zerga honetan inskribatzeko.”

Hamar. Hirugarren xedapen gehigarria txertatzen da; hona:

“Hirugarrena. 101. artikuluko 2. idatz zatian ezartzen dena aplikatzeko ezinbestekoa izango da bateragarria izatea Batasunaren ordenamenduarekin.”

Bigarrena. Joko jardueren gaineko zergaren uztailaren 9ko 23/2014 Foru Araua aldatzea.

Ondarearen gaineko zergaren uztailaren 9ko 23/2014 Foru Arauko 10. artikulua aldatzen da eta honela geratzen da (aldaketak 2018ko uztailaren 1etik aurrera sortuko ditu ondorioak):

“10. artikulua. Karga tasa

1. Tasa hauek aplikatuko dira:

1. Estatuaren kirol apustuak, martxoaren 27ko 419/1991 Errege Dekretuak, Estatuaren kirol apustuen bilketaren eta sarien banaketa arautzen duenak, ezartzen duenaren ondoriozko betebeharrak aplikatzen zaizkienak: foru arau honetako 9. artikuluko a) letrako zerga oinarriaren ehuneko 22.

2. Elkarrekiko, kontrapartidako eta gurutzatutako kirol apustuak; zaldi lasterketetako elkarrekiko apustuak eta kontrapartidako apustuak; elkarrekiko, kontrapartidako eta gurutzatutako beste apustu batzuk: foru arau honetako 9. artikuluko b) letrako zerga oinarriaren ehuneko 20.

3. Zozketak: foru arau honetako 9. artikuluko b) letrako zerga oinarriaren ehuneko 20; salbuespena: herri onurakotzat edo ongintzakotzat jotzen direnen gaineko karga zerga oinarriaren ehuneko 5 izango da.

4. Lehiaketak eta beste joko batzuk: foru arau honetako 9. artikuluko b) letrako zerga oinarriaren ehuneko 20.

5. Publizitaterako edo sustapenerako ausazko konbinazioak: foru arau honetako 9. artikuluan halakoetarako zehaztutako zerga oinarriaren ehuneko 10.

2. Zerga egoitza Ceuta eta Melillako hiri autonomoetako batean dutela bertan egoiliartuta dauden operadoreen gaineko tasak honako hauek dira:

1. Estatuaren kirol apustuak, martxoaren 27ko 419/1991 Errege Dekretuak, Estatuaren kirol apustuen bilketaren eta sarien banaketa arautzen duenak, ezartzen duenaren ondoriozko betebeharrak aplikatzen zaizkienak: foru arau honetako 9. artikuluko a) letrako zerga oinarriaren ehuneko 22.

2. Elkarrekiko, kontrapartidako eta gurutzatutako kirol apustuak; zaldi lasterketetako elkarrekiko apustuak eta kontrapartidako apustuak; elkarrekiko, kontrapartidako eta gurutzatutako beste apustu batzuk: foru arau honetako 9. artikuluko b) letrako zerga oinarriaren ehuneko 10.

3. Zozketak: foru arau honetako 9. artikuluko b) letrako zerga oinarriaren ehuneko 10; salbuespena: herri onurakotzat edo ongintzakotzat jotzen direnen gaineko karga zerga oinarriaren ehuneko 2,5 izango da.

4. Lehiaketak eta beste joko batzuk: foru arau honetako 9. artikuluko b) letrako zerga oinarriaren ehuneko 10.

5. Publizitaterako edo sustapenerako ausazko konbinazioak: foru arau honetako 9. artikuluan halakoetarako zehaztutako zerga oinarriaren ehuneko 5.”

Hirugarrena. Urtarrilaren 19ko 12/1993 Araugintzako Foru Dekretua, balio erantsiaren gaineko zergarena, aldatzea.

Hainbat aldaketa egiten dira Balio erantsiaren gaineko zergaren urtarrilaren 19ko 12/1993 Araugintzako Foru Dekretuan (2019ko urtarrilaren 1etik aurrera sortuko dituzte ondorioak):

Bat. 91. Bat.2 artikuluari 13. zenbakia gehitzen zaio. Hona:

“13. Pertsona fisikoak diren interpretari, artista, zuzendari eta teknikariek ikuskizun aretoetan ematen diren filmen produktoreei eta antzerki eta musika lanen antolatzaileei ematen dizkietenak.”

Bi. Hamalagarren xedapen iragankorra aldatzen da eta honela geratzen da:

“Hamalagarrena. Araubide erraztua eta nekazaritzako, abeltzaintzako eta arrantzako araubide berezia aplikatzeko mugak 2016ko, 2017ko, 2018ko eta 2019ko ekitaldietan.

2016ko, 2017ko, 2018ko eta 2019ko ekitaldietarako, arau honetako 122. artikuluko bigarren idatz zatiko 2. eta 3. zenbakietako lehenengo gidoian eta 124. artikuluko bigarren idatz zatiko 6. zenbakian ezartzen den magnitudea, 150.000 euro, hemendik aurrera 250.000 eurokoa izango da.”

#### XEDAPEN GEHIGARRI BAKARRA

Talde inbertsioko entitateen partaidetzen edo akzioen birsailkapenen zerga neutraltasuna.

Talde inbertsioko entitateen edo beren konpartimentu, mota edo serieen partaidetzen edo akzioen birsailkapenak azaroaren 4ko 35/2003 Legeak, talde inbertsioko entitateenak, eta hori garatzen duen araudiak arautzen dituzte. Bada, 2018ko urtarrilaren 3tik 2019ko martxoaren 29ra arte egiten diren birsailkapen horien xede bakarra irailaren 28ko 14/2018 Errege Lege Dekretuak, Balore Merkatuaren Legearen testu bategina (urriaren 25eko 4/2015 Legegintzako Errege Dekretuak onartzen duena) aldatzen duenak, ezartzen dituen betebeharrak betetzea bada, partaideak edo akziodunak pizgarriei lotutako kostuak jasan ez ditzan, partaideak edo akziodunak ez du errentarik lortuko pertsona fisikoen errenten gaineko zergarako, ez sozietateen gaineko zergarako, ez ez-egoiliarren errentaren gaineko zergarako, eta birsailkatutako partaide edo akziodunei esleitzen zaizkien partaidetza edo akzio berrien balioa eta eskuraketa data ordeztan dituzten partaidetza edo akzioenak izango dira.

Aurreko paragrafoan arautzen den tratamendua honako talde inbertsioko entitate hauen edo beren konpartimentu, mota edo serieen arteko partaidetzen edo akzioen birsailkapen hauei ere aplikatuko zaie, aurreko paragrafoan ezartzen den aldian eginez gero eta birsailkapenaren xede bakarra bertan finkatzen dena bada: azaroaren 27ko 33/2013 Foru Arauak, pertsona fisikoen errentaren gaineko zergarenak, 48.2 artikuluan aipatzen dituen talde inbertsioko entitateak, eta abenduaren 13ko 37/2013 Foru Arauak, sozietateen gaineko zergarenak, 79.3 artikuluan aipatzen dituenak.

#### AZKEN XEDAPENAK

##### **Lehenengoa. Indarrean jartzea.**

Xedapen orokor hau ALHAOn argitaratu eta hurrengo egunean jarriko da indarrean. Ondorioak, hala ere, artikuluetan adierazten den bezala sortuko ditu.

##### **Bigarrena. Gaitzea.**

Arabako Foru Aldundiari baimena ematen zaio xedapen orokor hau garatzeko eta aplikatzeko behar diren xedapen guztiak emateko.

**Hirugarrena. Batzar Nagusietara bidaltzea.**

Zerga premiazko araugintzako dekretu hau Arabako Batzar Nagusiei aurkeztuko zaie, indarrean dagoen arautegian ezarritakoaren arabera berretsi edo baliogabetu dezaten.

Vitoria-Gasteiz, 2019ko uztailaren 30a

*Diputatu nagusia*

*RAMIRO GONZÁLEZ VICENTE*

*Ogasun, Finantza eta Aurrekontu Saileko diputatua*

*ITZIAR GONZALO DE ZUAZO*

*Ogasuneko zuzendaria*

*TERESA VIGURI MARTÍNEZ*